

**JAVNA USTANOVA DOM ZDRAVLJA
KANTONA SARAJEVO
UPRAVNI ODBOR**

Broj:

Datum:

Na osnovu člana 32. i 34. Statuta Javne Ustanove Dom zdravlja Kantona Sarajevo i člana 34. Poslovnika o radu Upravnog odbora Javne Ustanove Dom zdravlja Kantona Sarajevo sastavlja se sljedeći:

ZAPISNIK

sa prve redovne sjednice Upravnog odbora Javne Ustanove Dom zdravlja Kantona Sarajevo održane dana 29.08.2019. godine u prostorijama Uprave Ustanove u ul. Vrazova 11., sa početkom u 15 sati i 30 minuta.

Sjednici su prisustvovali:

- Abel Baltić, predsjednik,
- Alen Pilav, član
- Branislav Kotjelnikov, član
- Lejla Begović, član
- Remzija Šetić, član

Ostali prisutni:

Prof.dr Mehmed Kulić, v.d. generalni direktor
Zlatko Viteškić, dipl.polit., sekretar Upravnog odbora

Predsjednik Upravnog odbora konstatuje da su prisutni svi članovi Upravnog odbora, te da isti ima kapacitet za punopravno odlučivanje.

Obzirom da su se stekli uslovi za punopravno odlučivanje Upravnog odbora Javne Ustanove Dom zdravlja Kantona Sarajevo, predsjednik Upravnog odbora je pozdravio prisutne i pročitao predloženi dnevni red:

DNEVNI RED

1. Usvajanje Zapisnika sa prve vanredne sjednice Upravnog odbora JU Dom zdravlja Kantona Sarajevo održane 31.07.2019. godine.

2. Prijedlog na davanje saglasnosti na potpis okvirnog sporazuma, OP 21/19 sa predmetom nabavke usluga održavanja medicinske opreme.

(Izvjestilac: prof.dr Mehmed Kulić, v.d. generalni direktor Ustanove)

3. Izjašnjenje na Prigovor pacijenta Adnana Omeragića.
(Izvjestilac: prof.dr Mehmed Kulić, v.d. generalni direktor Ustanove)

4. Izjašnjenje na Prigovor Ademira Spahića u vezi provođenja Javnog oglasa za popunu radnih mjesta objavljenog 01.07.2019. godine.
(Izvjestilac: Abel Baltić, predsjednik Upravnog odbora)

5. Razno

Predloženi dnevni red je jednoglasno usvojen.

Ad.1. Usvajanje zapisnika sa prve vanredne sjednice Upravnog odbora JU Dom zdravlja Kantona Sarajevo održane dana 31.07.2019 godine.

Predsjednik Upravnog odbora je otvorio raspravu te dao riječ prisutnima. Alen Pilav je dao primjedbu na Zapisnik u smislu da je trebalo navesti u zapisniku da je najavio izostanak sa prve hitne sjednice Upravnog odbora zbog korištenja godišnjeg odmora. Remzija Šetić je rekao da treba naglasiti da cijeloj sjednici nije prisustvovao V.D. generalni direktor prof.dr Mehmed Kulić, te da je potrebno ispraviti nekoliko tehničkih grešaka. Zapisnik je jednoglasno usvojen uz navedene primjedbe.

Ad.2. Razmatranje Prijedloga na davanje saglasnosti na potpis okvirnog sporazuma, OP 21/19 sa predmetom nabavke usluga održavanja medicinske opreme i Prijedlog na davanje saglasnosti na potpis okvirnog sporazuma, OP 16p/19 sa predmetom nabavke kancelarijskog materijala.

V.d generalni direktor je kratko upoznao prisutne sa sadržajem javnih nabavki. Nije bilo komentara tokom diskusije, te je jednoglasno data saglasnost Upravnog odbora na potpis navedenih Ugovora.

Ad.3. Izjašnjenje na Prigovor pacijenta Adnana Omeragića.

Predsjednik Upravnog odbora je dao riječ v.d. generalnom direktoru prof. dr Mehmedu Kuliću. Imenovani je rekao da postoje Odluke Komisije za Prigovore pacijenata i Rješenje Etičkog komiteta koji su odbili navedeni Prigovor kao neosnovan. Još je rekao da je indikativno da se imenovani javio pet mjeseci nakon liječenja sa prigovorom na postupak liječenja. Rekao je da je sa aspekta Primarne zdravstvene zaštite urađeno sve što je bilo u nadležnosti iste. Predsjednik Upravnog odbora je otvorio diskusiju po navedenoj tački dnevnog reda. Alen Pilav je rekao da Prigovor ima i dosta nesuvislih komentara nebitnih za suštinu Prigovora, te da smatra kako je potpuno jasno da se pacijent treba ispoštovati, ali da se mora štiti i dignitet Ustanove i zaposlenika iste. Predsjednik Upravnog odbora je rekao da smatra da uz mišljenje Etičkog komiteta koji je cijenio navedeni Prigovor, treba odbiti kao neosnovan. Navedeni Prijedlog je jednoglasno usvojen.

Ad.4.

Izjašnjenje na Prigovor Ademira Spahića u vezi provođenja Javnog oglasa za popunu radnih mjesta objavljenog 01.07.2019. godine.

Predsjednik Upravnog odbora je kratko izvjestio prisutne o sadržaju Prigovora Ademira Spahića, a koji se odnosi na činjenicu da je eliminisan iz dalje konkursne procedure zbog toga što nije priložio dokaz o posjedovanju edukacije iz porodične medicine. Dalje je naveo kako žalitelj traži da mu se kao dokaz o dodatnoj edukaciji iz porodične medicine prihvati ovjerena kopija položenih predmeta iz oblasti porodične medicine, koju je uredno priložio prilikom prijave na konkurs.

Sekretar Upravnog odbora je izvjestio prisutne da je Komisija za provođenje Javnog oglasa isključila navedenog kandidata iz dalje konkursne procedure jer je zauzela stav da se kao dokaz o edukaciji iz porodične medicine prihvati isključivo položen PAT u jednom od referentnih centara za isti.

Remzija Šetić je rekao da je Komisija za provođenje javnog oglasa zauzela ispravan stav, jer po njegovom mišljenju položen predmet iz neke oblasti nije dokaz o edukacije iz te oblasti, zato se dobija diploma i stručno zvanje, a naknadno se stiču dodatne edukacije. Takođe, upozorio je prisutne da prihvatanjem ovog dokaza u istu ravan stavljaju kandidate koji su uredno završili PAT sa onim koji nisu, još je jednom naglasio da je stav Komisije za provođenje javnog oglasa ispravan.

Alen Pilav je rekao da u oglasu nigdje nije navedeno da se kao dokaz o edukaciji iz porodične medicine traži isključivo PAT, te da smatra da predmetni prigovor treba prihvatiti kao osnovan, odnosno prihvatiti ovjerenu kopiju indeksa sa položenim ispitima iz porodične medicine kao relevantan dokaz za dalje učešće u konkursu. Posebno je naglasio da zbog nedorečenosti akata Ustanove, posebno misleći na Pravilnik o radu sa sistematizacijom radnih mjesta ne smije ispaštati kandidat na konkursu, te da Upravni odbor zbog neusklađenosti i nedorečenosti akata stalno ima probleme u svom radu.

Branislav Kotjelnikov je podržao u potpunosti stav Alena Pilava da tražena edukacija nije definisana što implicira širok spektar dokaza kojima se ista može i dokazivati.

Abel Baltić je rekao da zbog formulacije konkursa, predmetna žalba ima osnova jer nije tačno navedeno šta se podrazumjeva pod dodatnom edukacijom iz porodične medicine, pri tome je rekao da ne želi obezvrijediti PAT koji traje godinu dana, ali isti nije tražen konkursom. Prof.dr Mehmed Kulić je rekao da bi to značilo da se svaki dokaz priznaje, ako se tražila dodatna edukacija iz porodične medicine onda morate imati dokaz, jer da se traži zvanje onda bi kopija indeksa bila dovoljna, ali u ovom slučaju to nije dovoljno, jer se traži dodatni dokaz o traženoj edukaciji.

Remzija Šetić je ponovio da kopija indeksa iz bilo kojeg predmeta nije dokaz o dodatnoj edukaciju iz bilo koje oblasti. Navedeni stav je podržala i Lejla Begović. Prof.dr Mehmed Kulić je konstatovao kako nema pravo glasa ali da mora reći kako ispit položen na fakultetu ne može biti dokaz o dodatnoj edukaciji iz bilo čega, te je posebno istakao da posmatrajući slučaj iz svoje perspektive, to bi značilo da položen ispit na medicinskom fakultetu iz interne medicine znači odmah i specijalizacija iz iste oblasti, što naravno nije slučaj, jer je evidentno da je osim zvanja tražen i dodatni dokaz, ma koliko on jest ili nije definisan u predmetnom Javnom oglasu.

Lejla Begović je rekla da se mora imati dodatni dokaz osim kopije indeksa u navedenom slučaju. Abel Baltić je rekao da se može Prigovor vratiti V.D. generalnom direktoru na ponovno odlučivanje ili da se traže dodatna pojašnjenja od stručnih službi Ustanove.

Prof.dr Mehmed Kulić je rekao da podržava stav za dodatna pravna tumačenja jer se traži da se dva uslova konkursa ispune jednim dostavljenim dokazom.

Remzija Šetić je upozorio prisutne da se usvajanjem predmetnog Prigovora i drugim kandidatima mora priznati način dokazivanja, kao kod kandidata iz predmetnog prigovora.

Alen Pilav je rekao da treba usvojiti Prigovor i vratiti na postupanje Komisiji za provođenje Javnog oglasa. Remzija Šetić je rekao da Komisija za provođenje Javnog oglasa ne može preispitivati Odluku Upravnog odbora, nego ako se smatra potrebnim, Upravni odbor traži dodatna mišljenja i pojašnjenja stručnih službi Ustanove.

Alen Pilav je rekao da treba danas na sjednici odlučiti šta sa predmetnim Prigovorom, jer dodatna pojašnjenja mogu unijeti dodatnu zabunu u kompletan proces.

Nakon završene diskusije Abel Baltić je predložio da Upravni odbor donese Odluku kojom se usvaja Prigovor Ademira Spahića na provođenje konkursne procedure, te da se imenovani vrati u redovan postupak izbora kandidata na navedenom Javnom oglasu, uz prihvaćen dokaz o edukaciji iz porodične medicine odnosno kopiji indeksa o položenim ispitima iz navedene oblasti.

Za prijedlog Odluke su glasali Abel Baltić, Alen Pilav i Branislav Kotjelnikov, protiv je bio Remzija Šetić, a Lejla Begović uzdržana.

Abel Baltić je konstatovao da je sa tri glasa ZA, jednim PROTIV i jednim UZDRŽANIM usvojen prijedlog Odluke kojom se usvaja Prigovor Ademira Spahića.

Razno

Na Prijedlog v.d. generalnog direktora jednoglasno je usvojen prijedlog Odluke kojom se zadužuje v.d. generalni direktor, Šef službe pravnih, kadrovskih i opštih poslova, šef Službe ekonomsko – finansijskih poslova i pomoćnik generalnog direktora za Pravne poslove da pokrenu proceduru usklađivanja akata Ustanove sa pozitivnim zakonskim propisima.

Na Prijedlog Alena Pilava jednoglasno je usvojena Odluka o izmjeni i dopuni Poslovnika o radu Upravnog odbora JU Dom zdravlja Kantona Sarajevo i to u dijelu kojim se skraćuje rok za sazivanje sjednica sa sedam na pet dana, a zbog veće efikasnosti i bržeg rješavanja pristiglih predmeta i da se uvede mogućnost korespondentnog održavanja sjednica putem sredstava komunikacije kao što su e mail, video poziv i sl.

Remzija Šetić je tražio da se u narednom periodu dostavi Zapisnik sa treće redovne sjednice V.D Upravnog odbora JU Dom zdravlja Kantona Sarajevo, koji nije nikad razmatran niti je dostavljen, te da se u narednom periodu zapisnički konstatuje bilo kakvo izjašnjavanje Upravnog odbora putem e maila ili drugih sredstava komunikacije. Navedeni Prijedlog je jednoglasno podržan.

Alen Pilav je rekao da je dopuna Javnog oglasa za izbor i imenovanje generalnog direktora objavljena sa istim datumom kao i Javni oglas, te da Upravni odbor nije donio Odluku o dopuni Javnog oglasa.

Prof.dr Mehmed Kulić je predložio da se uradi dopuna ili ispravka Javnog oglasa, te da nije za to da se isti poništi.

Abel Baltić je rekao da postoji objektivni problem s tim što su i dopuna i konkurs objavljen pod istim datumom, te je predložio da sutra 30.09.2019. godine u nastavku današnje sjednice ili na potpuno novoj sjednici, Upravni odbor donese ispravku Javnog oglasa za izbor i imenovanje generalnog direktora.

Remzija Šetić je rekao da se slaže sa navedenim Prijedlogom te da se već sutra održi ili vanredna sjednica ili nastavak današnje sjednice gdje će biti spreman tekst ispravke i dopune Javnog oglasa za izbor i imenovanje generalnog direktora.

Svi prisutni su se složili sa navedenim prijedlozima te je nastavak sjednice zakazan za 30.09.2019. godine u 12 sati i 30 minuta.

Prvi dio sjednice je završen u 17 sati i 20 minuta.

Nastavak prve redovne sjednice

Datum: 30.09.2019. godine

12 i 30 sati

Predsjednik Upravnog odbora je otvorio sjednicu, pozdravio prisutne i konstatovao da su prisutni svi članovi Upravnog odbora JU Dom zdravlja Kantona Sarajevo.

Ostali prisutni:

Prof.dr Mehmed Kulić, v.d. generalni direktor

Zlatko Viteškić, dipl.polit., sekretar Upravnog odbora

Predsjednik Upravnog odbora je upoznao prisutne sa sadržajem Dopune i ispravke Javnog oglasa za izbor i imenovanje generalnog direktora JU Dom zdravlja Kantona Sarajevo. Upravni odbor je prihvatio dostavljeni tekst, sa konstatacijom da će Javni oglas biti otvoren 15 petnaest dana od dana posljednje objave dopune i ispravke Javnog oglasa.

Nastavak sjednice je završen u 12 sati i 50 minuta.

SEKRETAR UPRAVNOG ODBORA

Zlatko Viteškić, dipl.polit.

PREDSJEDNIK UPRAVNOG ODBORA

*Dr.sci. Abel Baltić,
specijalista interne medicine*
